

Olga Šestić rođ. Predanić, geometar



5. augusta 1999. godine umrla je u 67. godini Olga Šestić na Neurološkoj klinici u Sarajevu.

Dugo godina Olga je imala problema sa hipertenzijom i diabetesom, sa njima se hrabro nosila ali, bilo je dovoljno zadnjih 25 dana da izgubi tu posljednju bitku u svom životu.

Važno je istaći da Olga pripada generaciji geometara koja je živjela i radila neposredno poslije Drugog svjetskog rata, kada je trebalo učestvovati u obnovi porušene zemlje.

U to vrijeme u Bosni i Hercegovini novi premjer bio je prioritetan, pa svaki maturant Geodetske škole, još i prije završnog ispita bio je planiran za rad na novom premjeru. To je bilo vrijeme kada maturanti nisu uspjeli ni svoje diplome vidjeti, a već su dobivali naloge za rad na premjeru po Bosni i Hercegovini.

Teško je bilo djevojčurku od 17 godina, daleko od svoje porodice, preskakati plotove po Kozari, gaziti po hercegovačkom kršu, učestvovati na premjeru gradova Mostara, Bijeljine i drugdje gdje se vršio premjer, više gladni nego siti i kao po pravilu oskudno obučeni i obuvjeni.

Svoju struku je jako voljela. Draga joj je bila i zato što je terenska, u kojoj je bilo discipline i savršene terenske organizacije. U porodici je sa terena pričala samo o onim najljepšim trenucima, tako da je i svog sina pridobila za ovu struku, pa su joj prijatelji govorili za njenu porodicu – da je mala geodetska filijala.

Geodetska struka je prihvaćala sve savremeno u geodeziji, u premjer je uvedena fotogrametrija, pa je Olga imala čast da bude jedan od prvih restitutora.

Kada je osnovala porodicu, morala je prestati sa odlascima na teren, pa je radila na mnogim geodetskim kancelarijskim poslovima.

Penzionisala se davne 1976. godine i ona se posvetila porodici, i to potpuno bez ikakve rezerve kako je to samo znala Olga ili Medo kako su je njena djeca dozivala.

Porodica će tugovati za Medom, do kraja života. A prijatelji i kolege koji su voljeli iskrenost, uvijek nasmiješeno i dobronamjerno lice, dugo će se sjećati Olge ili Olgice kako su je prije zvali.

Sahranjena je prema sopstvenoj želji i ubjeđenju kojeg se držala cijelog života, ateistički, na groblju Sv. Josip, uz svoju majku, baku i djeda, sa zvucima SILENTIO.

Suphija Kuljuh